

04/05/1997

Mahathir hargai sumbangan tiga PM

BLANTYRE (Republik Malawi): Datuk Seri Dr Mahathir Mohamad hari ini menolak tanggapan bahawa hanya beliaulah satu-satunya tokoh yang bertanggungjawab mengemudi Malaysia mencapai kejayaan.

Sebaliknya, Perdana Menteri berkata, kejayaan Malaysia adalah hasil titik peluh tiga perdana menteri sebelumnya yang bersungguh-sungguh berjuang untuk memajukan ekonomi negara.

"Saya bernasib baik. Saya mewarisi usaha tiga Perdana Menteri yang memperjuangkan langkah memperbaiki nasib negara dan bangsa. Mungkin mereka memulakan proses itu sedikit lambat dan saya memegang teraju pemerintahan ketika fasa pertumbuhan ekonomi sedikit rancak.

"Saya melaksana dan menyambung dasar yang dilakukan oleh tiga Perdana Menteri Malaysia sebelum saya. Mungkin pemerintahan di bawah pentadbiran saya lebih inovatif," katanya ketika ditanya mengenai rahsia kejayaan Malaysia dalam sidang akhbar di sini lewat petang semalam.

Dr Mahathir berkata, kecemerlangan Malaysia juga dicapai hasil sokongan dan bantuan menteri-menteri dalam Kabinetnya.

"Kami mempunyai pasukan yang kuat dan mantap dalam Kabinet. Kami tidak bertengkar dan bergaduh dalam Kabinet," katanya.

"Malaysia juga stabil dari segi politik. Jadi semua faktor itu membantu memajukan Malaysia. Jadi bukanlah semua kejayaan Malaysia itu kerana saya," katanya.

Sejurus sesudah Dr Mahathir menjawab soalan itu, Presiden Malawi, Dr Bakili Muluzi mencelah: "Ada tiga faktor yang menyebabkan Malaysia berjaya. Pertama ialah kestabilan politik, kedua mutu perkhidmatan awam yang efisien dan ketiga, kearah politik yang jelas dan mantap."

Dr Mahathir juga ditanya apakah nasihat beliau kepada pemimpin-pemimpin negara di Selatan Afrika yang bersidang di Gaborone, Botswana. Perdana Menteri menjawab, ketua-ketua negara rantau itu harus menggunakan keamanan yang wujud untuk memajukan negara mereka.

"Negara-negara di Selatan Afrika aman sekarang. Kestabilan ini amat penting kerana jika anda mahu memajukan rantau itu, gunakan peluang itu pada zaman aman.

"Kalau asyik berperang saja, anda tidak mempunyai masa, tenaga dan wang ringgit untuk memikirkan soal kemajuan ekonomi," katanya.

(END)